

ԽՐԱԳՐԱԿԱՆ

ԾԱՅՐԱԳՈՅՆ ՊԱՏՐԻԱՐԺ
ԿԱԹՈՂԻԿՈՍ ԱՄԵՆԱՅՆ ՀԱՅՈՑPATRIARCHE SUPREME
CATHOLICOS DE TOUS LES ARMÉNIENSN^o

Ս. Էջմիածին

19

ԱՄԵՆԱՅՆ ՀԱՅՈՑ ԿԱԹՈՂԻԿՈՍ Տ. Տ. ՎԱԶԳԷՆ Ա.
ՎԵՀԱՓԱՌ ՀԱՅՐԱՊԵՏԻ ՔԱՐՈՋԸ
ՓՐԿՁԻ ՍՈՒՐԲ ՅԱՐՈՒԹԵԱՆ ՏՕՆԻ ԱՌԹԻՒՄԱՅՐ ՏԱՃԱՐՈՒՄ
(1994 թ. ապրիլ 3)

„Օրհնեալ է յարութիւն Քրիստոսի“

Սիրելի հաւատացեալներ, Սուրբ Զատիկ է այսօր, տօնն է Յիսուսի յարութեան հրաշխի:

Ամէն գարնան, մեր սրտերում բոլոր, ծաղկում է փառք ուրախութիւնը յարութեան աւետիսի: Մեծ աւետիսի, որ երկու հազար տարիներից ի վեր, իբրև գերագոյն բարի լուր, անցնում է դարերի միջով, անցնում է սերնդից սերունդ, միշտ նոյն հոգեցունց ուժականութեամբ: Հոգիների փրկութեան և արդարութեան ծարաւի մահախուճապ բազմութիւնները մարդկային, յաւիտապրելու տեսիլքը իրենց սրտերի մէջ ծրարած, յոյսի լապտերները վառ պահած, ցնծութեամբ են դիմաւորում բարի լուրը աշխարհաստան:

Մահուան ու չարի դէմ՝ Քրիստոսի յաղթանակով, ամէն տարի վերստին լուսաւորում է ճանապարհը մարդկային կեանքի, մեր կեանքի, ձեր բոլորի կեանքի:

Քրիստոսի յարութեան խորհրդի մէջ, մի՛ փորձէք թափանցել մարդկային մտքի չափանիշերով, կաղապարներով: Միայն սիրտն է, այսինքն՝ մարդկային հոգու յոյգերի աշխարհը, որ կարող է մեզ բաց անել արահետներ դէպի կատարները յարութեան հրաշխի: Այն սիրտը, որի առաջին զարկով սկիզբ է առնում մեր կեանքն այս անցաւոր, այն սիրտը, որ կարող է լուսաւորել ու առաջնորդել մեր գործերը, մեր մտքերը, այն սիրտը, որ կարող է մարդուն դարձնել բարի սերմերի սերմնացան երկրային կեանքի անդաստաններում:

Արդ, սիրելի՛ ժողովուրդ, կանգնած այսօր կեանքի ու մահուան սահմանների վրայ, ցնծագին ուրախութեամբ աւետենք Քրիստոսի յարութիւնը: Թող մեր սրտերում վերստին պայծառանայ մեծ յոյսը մեր հոգիների փրկութեան ու անմահութեան, իբրև յաղթանակը արդարութեան:

Այո, այսօր, Ս. Զատիկի առաւօտեան, հրամայականօրէն այժմէական է խօսել արդարութեան յաղթանակի մասին նաև մեր ժամանակների մարդկային կեանքում, որովհետև չարի խափանումով, արդարութեան

յադրութեամբ է, որ հնարաւոր պէտք է դառնայ պահպանումը և ամրապնդումը աշխարհի խաղաղութեան և պետութիւնների համերաշխ գոյակցութեան: Արդարութիւն և խաղաղութիւն իրարից անբաժանելի, իրար պայմանաւորող քրիստոնէական սրբազան գաղափարներ են, որոնք, ինչպէս անցեալում, նաև այսօր, ամենաֆաղցր երազանքներն են հանդիսանում բոլոր ժողովուրդների լայն զանգուածների:

Այսօր Ս. Զատկի օրով, երբ ոգեկոչում ենք նուիրական յիշատակը Յիսուսի, որ Գողգոթայի բարձունքի վրայ իր արիւնը թափեց՝ սիրոյ, խաղաղութեան և արդարութեան պատգամները իր շրթներից, մեր քրիստոնէական խիղճը թելադրում է մեզ՝ մատնանշել չարիքի արմատները, որոնք դարերից ի վեր արգելափակում են բնական զարգացման ընթացքը ընկերային ու միջազգային կեանքի, դէպի ստեղծումը և ամրապնդումը մի արդար ու խաղաղ աշխարհի: Այդ օրը պիտի գայ այն ժամանակ միայն, երբ մարդկային ընկերային ու միջազգային կեանքը վերականգնուի ճշմարտապէս Քրիստոսի Աւետարանի բարոյականութեան հիմքերի վրայ: Երբ մարդիկ իրենց համար հոգեկան պահանջ նկատեն բարօրութիւնը իրենց նմանների: Երբ ժողովուրդները իրենց սեփական ապահովութիւնը և ազգային շահերի պահպանումը տեսնել սովորեն՝ աշխարհի բոլոր ազգութիւնների եղբայրութեան, անվտանգութեան և փոխադարձ շահերի միասնութեան գիտակցութեան մէջ:

Սէր դէպի Արարիչը բարեխնամող և դէպի Նրա արարչագործութիւնը հիասքանչ, սէր դէպի մարդը, դէպի բոլոր մեր նմանները անխտիր, ահա մայր ապրումը Յիսուսի, ահա սեպուհի պատուիրանը Նրա:

Աստուծոյ ու մարդկանց հանդէպ մեր սիրուց է, որ բխում է գոյութեան իմաստը երկրային կեանքի և ուրախութիւնը ապրելու, սէրը բարու և ճշմարտի, սէրը արդարութեան ու խաղաղութեան, սէրը շինարար աշխատանքի և համերաշխ գործակցութեան, մարդկանց և ազգութիւնների միջև:

Մարդու գոյութիւնը և պատմութիւնը պատահական և աննպատակ իրողութիւններ չեն: Անհնար է համոզուել՝ թէ մարդկային կեանքը, նւթական տիեզերքի կոյր փոթորկումների մի ակնթարթի փրփուր է միայն:

Մեր սուրբ հայրերից Ներսէս Շնորհալի Կաթողիկոսը Ամենայն Հայոց մեզանից ութ հարիւր տարիներ առաջ երգել և փառաբանել է այդ սէրը, Յիսուսի սէրը, աղերսելով, որ այդ սիրով նմուեն, շաղախուեն սրտերը մարդկանց՝

«Սէր անուն Յիսուս,

Սիրով քով նմեա,

սիրտ իմ փարեղէն»:

Ինչքան այծմէական, ինչքան ճշմարտացի են հնչում այս սուրբ խօսքերը նաև մեր օրերում:

Սիրելի հաւատացեալներ, նայեցէ՛ք աշխարհին, մեր ժամանակների կեանքի պատկերին, միջպետական յարաբերութիւններին, միջազգային անցուդարձերին ու պիտի տեսնէ՛ք, թէ մարդկութիւնը այսօր էլ տագնապում և

տառապում է վատառողջ, հիւանդագին մղումներից, շահագործումներից, բռնութիւններից, ազգամիջեան ատելավառ քշնամութիւններից, եղբայրասպան արարքներից, արիւնալի պատերազմներից: Դարեր շարունակ հայ ազգը իր իսկ հայրենի հողի վրայ նման տառապանքներ ու ողբերգութիւններ է ապրել, ինչպէս նաև մեր օրերին՝ հայոց արցախեան աշխարհում:


Մենք ևս, հետևաբար, Շնորհալի մեր մեծ Հայրապետի խօսքերով դիմենք յարուցեալ Աստուածորդուն, աղերսելով՝ Տէր մեր և Փրկիչ մեր Յիսուս Քրիստոս, Քո սիրովդ նմի՛ր փարեղէն սրտերը մեր ժամանակների մարդկանց և փրկի՛ր մարդկային աշխարհը վերջնական կործանումից:

Երանի՛թ է մեր օրերի պետութեանց սահմանադրութիւններն ու օրէնքները ևս շաղախուած լինէին Քրիստոսի սիրով, Քրիստոսի Աւետարանի խաղաբարար շնչով:

Սիրելի հաւատացեալ զաւակներ Մեր, որ ի Հայաստան և որ ի սփիւռս աշխարհի, այս խոհերով ու իղձերով բերում ենք ձեզ բոլորիդ անխտիր աւետիսը Քրիստոսի սուրբ յարութեան, խոր հաւատով, որ մեր հայրենաբնակ ժողովուրդը Հայաստանում և Արցախում վերջապէս ազատագրուած անցեալի ողբերգական ճակատագրի կապանքներից, իր մայր հողի վրայ պիտի ապրի ու գոյատևի ազատ ու ինքնիշխան, և կերտի իր նոր ապագան:

Ինչ լաւ է սիրելիներ, որ գարուն է այսօր, որ Զատիկ է այսօր, որ մենք՝ բոլոր հայաստանցիներս, մեր հայրենի հողի վրայ ենք ապրում մեր նորաստեղծ անկախ պետութեան հովանու ներքոյ, որ մարտնչում ենք յաղթահարելու մեր առաջ ծառացած դժուարութիւններն ու զրկանքները անմար յոյսով, որ պիտի հասնենք նաւահանգիստը արդարութեան և խաղաղութեան:

Փա՛նք արդարութեան արեգակ և խաղաղութեան իշխան յարուցեալ Փրկչին մերոյ Յիսուսի Քրիստոսի այժմ և յաւիտեան. ամէն:



Կարգապահ

ԿԱԹՈՂԻԿՈՍ ԱՄԵՆԱՅՆ ՀԱՅՈՑ